

## Ramurs duront la notg

L'onda Marta era ina dunna empau pli passada che aveva magari dus mauns seniasters. Perquei ch'ella era savens persula, aveva ella la disa da far entirs discuors cun sesezza. Pigl auter era ella adina da buna luna; vul dir sch'ins vilentava buca ella. Lu saveva ei esser ch'ella daventava ina vera furia. Duront il di luvrava l'onda Marta ella pasternaria Panini. La sera mirava ella las novitads e suenter haver buiu in te, mava ella beinspert a letg.

Era oz ei quei buca stau auter. Ella ei ida a letg ed ei scochemai sedurmentada. Ei era biebein mesanotg, ch'ella ei tuttenina vegnida neunavon. Ramurs havevan destadau ella.

Cheu! Puspei! Ei ha tgulau, sco sch'enzatgi aruess truchets. Quellas ramurs vegnevan orda stiva. L'onda ha envidau la cazzola ed ei vegnida orda letg. Dalla tema ch'ella aveva pigliau stevan ils cavels tut agradi. Per far la segira ha ella aunc vuliu prender in uaffen cun ella. Ella ha aviert la scaffa ed ha tschaffau in lenn da resti. Quei stueva tonscher sco arma! Enten far quei seglia ella culla stgeina comba el cantun dalla scaffa. Tgei dolurs! Tut a zuppegiond e sevilond eis ella ida vi tier igl esch ed ha aviert quel, denton mo in techet. Ins sa gie mai! En stiva era ei tut stgir. Nuot che semuentava ni balluccava.

„Ei enzatgi cheu?“, ha l'onda Marta dumandau. „Na“, rispunda ina vusch bassa sut il canapè neuadora. All'onda Marta dat in crap giu dil cor. „Lu stoi jeu haver semiau. Ni che jeu mondel en fanzegna“, ha ella murmignau, ha scurlau il tgau ed ei puspei ida enta letg. L'autra damaun eis ella sesmarvigliada buca mal. Tgei disuorden! Quei stueva esser stau in lader! La vasa custeivla, tut la pusada d'argien, ils maletgs, la televisiun ed il radio, naven! Era ils daners dil tenercasa eran buca pli ella cuppa da creffis.

L'onda Marta ha immediat clamau la polizia ed ha raquintau tut quei ch'era curriu e passau duront la notg. Il sulet che ha pariu empau curios ad ella, ei ch'ils polizists han entschiet a rir da schluppar.

Sas ti daco?